

# OLE SULU SAMOA



EKALESIA FAAPOTOPOTOGA KERISIANO SAMOA  
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

OLE SULU SAMOA

FEPUARI 2021

email: [sulusamoa@cccs.org.ws](mailto:sulusamoa@cccs.org.ws) -Main Office: Ph. 24414, Ext 30 - website: [www.cccs.org.ws](http://www.cccs.org.ws)

**MALUMALU 'OLE ATUA SOIFUA' EFKS SAANAPU-UTA**



# FAASINO UPU

1. O le Lauga	2
2. Lauga Aso Lulu o Lefulefu	4
3. Malumalu EFKS Saanapu-uta	5
4. Fono Usufono Fono Tele 2020	6
5. Tuufaatasiga Faiga Taulaga 2020	8
6. Na o Afioaga e Tulei mai Fofoga	9
7. O Tatou Mea'ai e Tatau ma le Aso	10
8. O e ua fai i Lagi le Folauga	14
9. Ata o e Maliliu & Osiga Feagaiga	16

## O LE LAUGA

Tusi Faitau: F.Tuai – Malaki 3: 13 – 18  
F. Fou – Luka 10: 17 – 20

Matua: Luka 10: “<sup>20</sup>Ae peitai ‘aua tou te olioli i lenei mea, ina ua usiusitai agaga ia te outou; a ia olioli ona ua tusia o outou igoa i le lagi.”

Manatu Autu: **FAILE MEAE TATAU ONA FAI  
(DO THE RIGHT THING)**

O le tele ia o mea ua tatou faia, o mea sesē (unscrupulous activities). O nisi taimi ua tatou masani ai, afai e to'atama'i le faifeau i se tamaiiti i le Aulotu, ona fasi ai lea o le atalii o le faifeau – o se mea sa'o? Afai ae faavesivesi le faifeau ma le Aulotu, e amo e le tina o le galuega mafatiaga o le faifeau. O le molimau a si tina malolo manumalo i la la'ua galuega, fai mai a ia (Le Lauao Sinasina), “A ita lo'u toalua (le faifeau) ona o mea e tutupu i le faifeau ma le aulotu, e ti'et'i e i luga o le ulu o le toalua o le faifeau.” E tautala ma le faaeteete, o le upu e toe faafoi mai. A o lena e te silafia ma ua tatou iloa lava e lē faigofie. Auā, e lē o se fia teuteu lumafale. E lē o se selu e tu i le taga. E leai. Auā o le faitau a le au ao sinasina, “Aua le naunau i le i'a, ae manumanu i le upega.”

**FAI LE MEA E TATAU ONA FAI. DO THE RIGHT THING.**

Ua toe foi mai soo e fitusefulu (70) o Iesu. Ua toe foi mai ma le manuia. Ua toe foi mai le misiona a le 70 lea ua laveia le faamoemoe. O le faasinoga o le 70 lea fai mai Luka, “<sup>1</sup>Mulimuli ane ua tofia e le Alii nisi e toafitugafulu, ua aauina atu i latou e taitoalua e muamua atu ia te ia, i aai uma ma mea uma o le a maliu atu i ai o ia.” O le misiona

lea a le fitusefulu (70), o le ata foi lea o le faa-misiona a soo o le Alii e toasefulu ma le lua (Lk.9:1-6). O le manulautū lava lea o le au soo e sefulu lua, e pei ona i ai le faamoemoe o le fitusefulu lea: Ia tala' i le Malo o le Atua, ma ia faamalolo i ma'i. O le fitusefulu (70) o se fuainumera e tele lona faitau, e faasefulu ona faateleina le fitu (10x7); o se numera tele i lona aofa'i (plural), e lē pei o le numera 7 o le numera tasi (singular).

E i ai le lagona o le fitusefulu lea, o le numera faa-faatusa (symbolic); o lona uiga o le numera ua atoatoa. O aiga ia o atalii o Noa, na ainā solo ai atunuū i le lalolagi ina ua mavae le lolo (Kenese 10). O le fitusefulu lea, “<sup>27</sup>o tagata atoa uma o le aiga o Iakopo e na o mai i Aikupito e toafitugafulu lava i latou.” Kene.46. E toafitugafulu toeaina o Isaraelu sa fesoasoani ia Mose i lana taitaiga (Numera 11:16, 24 & 25). Ua fai mai le fai Salamo 90, “<sup>10</sup>O tausaga o matou olaga e fitugafulu ia tausaga.” E manatu le au popoto o le Tusi Paia, o le 70 – (i) o le atoatoa (completeness), (ii) o le soifua matua (matured), o lona uiga o le tofa ma le faautaga. O le Au Soo lea e 70 o le Auvaa ua filifilia. O se auvaa ua mafa tautai, ua foi mai ma le fiafia. “Le Alii e, ua usiusitai mai temoni ia te i matou ona o lou suafa.”

O le upu e faasino i le lagona o le au soo, o le ‘olioli’. Olioli – o lona uiga o le galuega ua faamalieina, o le misiona ua tau lau. O le upu anoa lea, o le olioli. I le faa-Peretania, o le ‘rejoice’, ‘exalt/to praise’. O le ‘olioli’ lea o le lagona e maloloina, o le ituaiga lea e fiafia, mamā, ma lelei. O le olioli lea e fesootai ma le viiga o le Atua, o le olioli e fesootai ma le ifo atu i le Atua, to exalt/to praise/to worship. Peitai e i ai le olioli e ma'i. E i ai le fiafia e lē lelei. O le fiafia ua ‘ova atu. O le lagona lea, o lea ua maua e le fitusefulu (70) o soo o le Alii. O se lagona ua tupu a'e i le loto, ua mimita; o le olioli ua ova atu (rejoice greatly). Ua lē o le exalt, a ua ‘exult’.

Ua fai mai le fatu pese Eperu, “<sup>1</sup>O oe na le toa, se a le mea e te mitamita ai i le leaga? O loo agalelei le Atua i aso uma lava.” Sala.52. A o la le perofeta o Ieremia 9, “<sup>23</sup>Aua ne'i mitamita le tagata poto i lona poto, 'aua nei mitamita le tagata malosi i lona malosi, aua nei mitamita foi le mauoa i ana oloa; <sup>24</sup>a o lē mitamita, ina mitamita ia o ia i lenei mea, ina ua mafaufau o ia, ma ua iloa o a'u lava o le Alii, o lē faia le alofa, ma le faamasinoga, ma le amiontonu i le lalolagi.” A o le molimau a le aposetolo o nuu ese i Kalatia 6, “<sup>14</sup>A

*o a'u, 'aua ne'i o'u mitamita i se mea, tau lava o le satauro o lo tatou Alii o Iesu Keriso..."*

Na tali Iesu i le au soo lea e 70, "Ae peitai, 'aua tou te olioli i lenei mea, ina ua usiusitai agaga ia te outou; a ia olioli ona ua tusia o outou igoa i le Lagi." Ua silafia lelei e Iesu, ua faasaga ese le lagona o le au soo lea. Ua sa'o ai le faitau a le au matutua, 'Ua muli mai ni oli, a o ni foli.' Ae manatua la e tatou, ua uma ona faailoa mai e le Alii, "ua toilalo Satani". Luka 10, "<sup>18</sup>*Ua fetalai atu o ia ia te i latou, Na ou iloa Satani ua pa'ū mai le lagi pei se uila.*" <sup>19</sup>*Faauta, ou te foai atu ia te outou le pule e soli ai gata ma akarava, ma le malosi uma o le fili; e leai lava se mea e leaga ai outou.*" Ua uma ona fofola le fala e Iesu, mo le au soo lea, ae maise o Lona finagalo paia. O loo molimau mai le aposetolo o Paulo, "<sup>7</sup>*Auā o ai ea na te faaeaina oe? Se a foi se mea ua ia te oe e le'i foai iina atu? A e afai na foaiina atu ia te oe, se a le mea ua e mitamita ai, peiseai e le'i foaiina atu lava?*" I Kori.4. O lea ua tuuina mai e Iesu mea uma mai lona Tama. O le a se isi mea faasili, ua latou faia? "Aua tou te olioli i lenei mea, ina ua usiusitai mai agaga ia te outou; a ia outou olioli ina ua tusia o outou igoa i le lagi."

Ua aveese e Iesu le uiga sesē o le au soo, i le auala sa'o, 'the right channel'. Auā e mafai lava ona usiusitai mai temoni, ae lē mafai ona talia ai se isi i le malo o le Atua. <sup>22</sup>*E toatele latou te fai mai ia te a'u i lea aso, Le Alii e, le Alii e, matou te le'i perofeta ane ea i lou igoa, o lou igoa foi na matou tulia ai temoni, o lou igoa foi na matou fai ai vavega e tele?* <sup>23</sup>*Ona ou tautino atu ai lea ia te outou, Ou te le'i iloa lava outou; ina o ese ia outou ia te a'u, o outou o e fai amio leaga.*" Mata.7. E peiseai ua faapea mai le Alii, 'Fai le mea e tatau ona fai. I se isi fuaitau, 'Fai le mea sa'o (Do the right thing)'. E nanamu i fofoga o le Atua, o le 'olioli' ua vivii atu i le Atua. "A ia outou olioli ina ua tusia outou igoa i le Lagi". Auā o le au soo lea e 70, o le fanau a le Atua, e ala i le faatuatua. O lea ua faailoa mai e Iesu, "ua tusia outou igoa i le Lagi"; auā o le Tusi lea, o le Tusi a le 'Tamai Mamoe', o le 'Tusi o le Ola' (*The Lamb's Book of Life*) Fa'aaliga 3:5.

O le manatu o le au popoto e faapea, "E sili atu le malosi o le avea ma fanau a le Atua, nai lo le avea ma ē o faia vavega. E sili atu le Alofa faa-le-Atua, nai lo le tautala i gagana." O i latou ua tusia o latou igoa i le Lagi, e tumau e faavavau. <sup>3</sup>*O lē manumalo,*

*e faaoefuina o ia i ofu sisina; ou te lē sōloiesea foi lona igoa i le tusi o le ola, a e ou te ta'u atu lona igoa i luma o lo'u Tamā, ma luma o ana agelu.*" Fa'aa.3. O la Iesu, "Aua tou te olioli i lenei mea, ina ua usiusitai agaga ia te outou; a ia olioli ona ua tusia o outou igoa i le lagi." Fai le mea e tatau ona fai. Do the right thing.

O le vaitaimi o le leaga o le nuu o le Atua, o le taimi o le perofeta o Malaki. O le agasala matuiā o le tupulaga a Malaki, o le taufaifai i le Atua (blaspheme). Na fetalai le Atua e ala i le perofeta, "<sup>13</sup>*Ua mamafa a outou upu ia te au.*" O a upu mamafa? Ua latou faapea ane, "*E lē aogā ona auauna i le Atua. Se a foi se mea ua maua, ina ua tausiusi i ana poloaiga?*" O le itu e faanoanoa ai, o le ta'ita'i sesē ai o le au vaivai (the unfortunate). Ona fanafanau lea o le amioleaga, ma tupu tele le faamaualuga. Ua fai mai le tusitala o le Tusi o Malaki, "<sup>16</sup>*Ona fetautalatala'i lea e na matata'u i le Alii; ua liliu mai foi e le Alii ona fofoga, ma ua faafogofoga mai;*" 'E na matata'u i le Alii' – o se vaega itiiti; 'E manatua ai i latou' – ua filifilia e le Atua. 'O e na totoe' – the Remnant. O i latou ia ua faafogaina e le Atua. "*Ona tusia lea o le tusi e faamanatu ai i ona luma, mo e matata'u i le Alii, ma mafaufau i lona suafa.* <sup>17</sup>*E fai foi i latou ma'u oloa tāua.*" O le tala fiafia, o lea ua faamautū mai e Malaki, e i ai le Tusi o le Ola. O iinei foi, o loo ua faailoa mai ai le Silisili ese o le Atua, i lenei itu o loo fia faamamafa mai e le perofeta. E tolu lava upu 'ānoa' o le Mataupu Silisili o loo faamatala mai ai le uiga o lo tatou Atua Soifua: (i) o le Atua e silafaina mea uma (omniscient); (ii) o le Atua e auai i mea uma (omnipresent); (iii) o le Atua e mafai mea uma (omnipotent). O le fesili: Afai o le Atua e silafaina mea uma, afai o le Atua e auai i mea uma, afai o le Atua e mafai mea uma, aiseā ua toe tusia ai lea tusi?

- (1) O le faamoemoe o le tusi lea, "ia tusia ai i latou o e matata'u i le Atua", "ma mafaufau i lona suafa", "e avea foi i latou mā'u oloa tāua".
- (2) O i ai foi i le tusi lea, le avanoa mo le tagata e taufaifai i le Atua; o i ai le avanoa mo i latou o ē lē anaana i le Atua. O i ai le avanoa, afai e lē o tusia ai lou igoa, o le tagata e faatu'u'ala i le Atua, o lona uiga ua misia oe i le Lagi. E leai se alofaga. Pau lava le avanoa atamai, o le salamō, ma toe foi i le Atua.

(3) O le meaalofa sili lava lea a le Atua na foai mai i le tagata, o lona mafaufau (knowledge). O loo ua faapea mai le perofeta, “*Ona tusia lea o le tusi, e faamanatu i ona luma*” O le faamanatu, o lona uiga, o le malosi o le mafaufau (memory). Po o le a lava se malosi o i le tagata, e i’u lava ina gase. A o le a foi le finagalo o le Atua, ona oti lea o le tagata, ona lē manatua lea o lona mafaufau ma le iloa. O ai e faamanatuina oe i luma o le Atua? O le Tamai Mamoe a le Atua. “*Ou te lē soloiesea foi lona igoa i le tusi o le ola, ae ou te ta’u atu lona igoa i luma o lo’u Tama, ma luma o ana agelu.*” O se faalototele mo soo se tagata e fia auauna i le Atua. I le ma lenei, *Efai i latou ma’u oloa tāua*. O le upu lea ua faa Samoa e nai toeaiina, ‘o le oloa taua’ e sau mai le upu Eleni, o le Segullar – Sekulā. O le ‘segullar’ i le faa Peretania o le ‘possession’, o lona uiga o le ‘mea totino’ – o se mea ua i ou lima, e pei o lau taavale, o lou fale, ma isi mea-a-fale. O le mea ua i lima o le Atua; o se mea ua possess e le Atua, o se mea ua pele i le Atua. O le ‘oloa taua’ o lona uiga ua pele i le Atua; ua ‘u’u i ona aao e lē toe aveesea. Fai mai le faaSamoa a nai toeaiina, “*e fai i latou ma’u oloa taua*”. O le oloa taua – it’s a jewel, a precious stone. Ua fai mai le perofeta o Malaki, ‘*Ona tusia lea o le tusi, e faamanatu i ona luma, mo e matata’u i le Alii, ma mafaufau i lona suafa. E fai foi i latou ma’u oloa tāua*.

Ua fai mai le Autū o mafauauga faaleagaga, ‘Fai le mea e tatau ona fai’/Do the right thing. O le upu lea a Iesu, *Luka 17*, “<sup>10</sup>*O auauna lē aogā i matou nei; auā o mea e tatau ona matou fai, o mea ia ua matou faia.*” O le upu foi lea na pa’ū mai lona fofoga i le au soo lea e 70, ina ua foi mai ma le fiafia, “ *Ae peitai ‘aua tou te olioli ina ua usiusitai agaga ia te outou, a ia olioli ona ua tusia o outou igoa i le Lagi.*” O le manaia ia o le tala i le tinā o Litia, i le malaga a Paulo i Maketonia (*Galu.16:11-17*). O le molimau a Luka, “<sup>14</sup>*Ua faalogo mai foi ia te i matou le tasi fafine ua mata’u i le Atua, o Litia le igoa...ua tatalaina e le Alii lona loto ia naunau i upu na tautala a’i Paulo..*”

Ua fai mai le matua o le lauga, “*a ia olioli ona ua tusia o outou igoa i le lagi.*” Fai le mea e tatau ona fai. Do the right thing. O le maliu ma le toetu o le Keriso, o Lona finagalo alofa lea mo i tatou. ‘Ia fai le mea e tatau ona tatou fai, auā o mea ia ua matou faia.’

Ia manuia lau faitau. Ma ia i le Atua e toatasi o lona lava viiga, nei e faavavau, faavavau lava. Amene.

*O se faafetai ona ua maua se avanoa e ala i le Sulu Samoa, e momoli atu ai alofaaga o si o’u nei ‘tama’i leona’, o si o’u toalua o Sioi Tanielu Tuilagi Matagi, ma si a ma fanau e to’ a4 tama, i le EFKS Tanumalala. Ua faamalo faafetai, i le fitaituga ai, ma le nopia’i ai i tofi ma tiute i le Ekalesia, e ala i le igoa pele o le EFKS i nuu e mamao, ma Tutuila ma Samoa nei. Tau ia ina uia le ala o le atu, ou te popole ne’i o’u ‘talanoa atu a le talanoa manu’. E faigata le Ekalesia, o le vaa e ufigatā. Ou te loto tele i le faatuatua, ua tusia outou igoa i le Lagi.*

*I le oo mai o le tala o le faama’i, le Koviti-19 coronavirus, ona o le mata’utia. Ae ou te faafetai i susuga Toeaina ma le au uso, e tautala ma le faaeteete o le upu e toe faafoi mai, ona o le galuega faaperofeta a le EFKS. Ua tusia o outou suafa i le Lagi. Faafetai i Faiga Lotu, i le taeao ma le afiafi, ae maise o pesepesega ma viiga, o se faalototele ‘feagia’i’ a o feagia’i ai le savili faanoanoa o lenei faama’i oti. Ia faamanūina le suafa o lo tatou Atua soifua!*

Saunia: Susuga Motuga Matagi FS  
EFKS Tanumalala, Matagaluega AANA

## **LAUGA ASO LULU O LEFULUFU**

*(saunia faapitoa mo le Iunivesite Aoao Samoa)*

Tusi Faitau Aso: Esekielu 37: 1 - 14; Mata.11:28  
Matua: Esekielu 37, “<sup>11</sup>*Ona fetalai mai lea o Ia ia te au, Le atalii e o le tagata, o ia ivi o le aiga uma ia o Isaraelu; faauta, ua latou fai mai, Ua mamago o matou ivi, ua faaumatia lo matou faamoemoe, ua fano lava i matou.*”

## **Manatu Autū: Toe Faaolaina (Restored)**

E i ai le manatu ua outou faalogo uma i le Mataupu - O le Tafeaga a Isaraelu/Exile of the Jews. Afai e leai, o loo maua i luga o le Wikipedia. O auga tupulaga ia sa ave faapagotā ai tagata Isaraelu e isi malo malolosi tu tuaoi, i Sasa’e Tutotonu. Malo sa latou osofa’i, ma faatoilalo Isaraelu, le nuu filifilia o le Atua, ma ave ai faamalosi, faapagotā ma pologa ai i nuu ese, o nuu faapaupau e lē talitonu i le Atua. O le tafeaga sili ona lauiloa, lea na osofa’ia ai e le tupu o Nepukanesa ma vaega’au a Papelonia, le malo o Iuta ma lona laumua, le aai paia o Ierusalema. Ua *(silasila itulau 6)*

## FAAULUFALE MALUMALU EFKS SAANAPU-UTA

“*O mai ia, tatou o a'e i le mauga o le Alii, o le fare foi o le Atua, e a'oa'o mai ai o Ia ia te i tatou i ona ala.*” Mika 4.

O le susuga i le Toeaina o le Pulega Safata ma Siumu, Kereta Fuafiva FT na ta'ita'i le sauniga mamalu e faapaia ma faaulufaleina ai le malumalu o le EFKS Saanapu-uta, ua faaigoaina ‘O LE ATUA SOIFUA.’ O le mae'a ai o Taalolo i le 11.00 taeao o le Aso Tofi 18 Fepuari 2021 na faasolo ai loa sauniga o lea aso. Na amata i le ‘o’otiina o le lipine e le Faletua o le Sui Taitaifono Fono Tele, afiogaTeki I. Uilelea, sosoo ai ma le tauaaoina o ki o le malumalu, e le afioga Alo Gaugau e fai ma sui o le Konekarate Zheng Construction sa fausia le galuega. O le susuga Feata Perelini FS (Lotofagā/Failautusi Matagaluega FSS)sa faitauina le Tusi Paia, a o le Lauga na saunia e Tuia Peseta (Siumu, Failautusi Pulega), e faavae i le Tusi Faitau o lea lava aso - Ta’umātuaina. O viiga o le Atua na saunia lelei e le Aufaipese a le Aulotu, faatasi ma sui o le Ekalesia ma le afioaga (Cyber Choir) o loo tapua'i mai atunu mamao, ua le mafai ona auai mai ona o aafiaga o le Koviti-19. Na saunoa le afioga Taitaifono Fono Tele, susuga Tunumoso Iosia FT e momoli le faamalo ma le faafetai tele a le Ekalesia Aoao i le susuga faafeagaiga ia Denny Epati FS ma le faletua ia Puna, ma le Ekalesia i Saanapu-uta, tainane ana tama fanau ma taulaga soifua, e tusa o lo latou fitaituga i le galuega a le Atua.

Na si'i e le susuga i le Toeaina Taitaifono le molimau a Neemia e tusa ma la latou foi galuega i le Feagaiga Tuai, “*Ua matou atia le pa; ua fesootai foi le pa uma e oo i lona vaeluagalemu; auā sa loto lava le nuu i le galuega.*” Nee. 4. Ia viia le Atua, ona o le galuega tele ua faatino i taimi faigata o faama'i pepesi i le lalolagi ua afaina ai le tamaoaiga. Sa faapea foi ona ia faaleo le faafetai a le Ekalesia ona o faiga taulaga o tausaga ua tuana'i, o loo taulamua ai le EFKS Saanapu-uta (2020=\$94,000) i le ‘a’ao foai a le Pulega Safata ma Siumu, ma le Matagaluega Falealili Safata Siumu. Ua lē avea le galuega o le malumalu, e fai ma ‘alofaga o le soifua tautua pe faaitiitia ai le soifua ositaulaga masani. Na ta'ua foi e le afioga Taitaifono Fono Tele le faatofalaiga i le afio o Anapu ma le Toalima o Alii, ua tasi ai le lotu i totonu o le afioaga, na o le EFKS. Mata o le pogai lea ona tele o ana tama fanau ua fa'aaogā e le Atua mo Lana galuega paia, “*auā sa loto lava le nuu i*

*le galuega..*” Ona tau'a'ao atu lea e le afioga Taitaifono Fono Tele le meaalofa \$20,000 a le Ekalesia Aoao e tusa ma ana Iugafono, e fai meaalofa ai le EFKS mo le malumalu fou, O LE ATUA SOIFUA, faatasi ma le tatalo i le Atua e ana le galuega, ia alofa faamanuia mai ona tagata faatuatua. O le Tala o Tupe o le galuega sa fofogaina e le Failautusi o le EFKS Saanapu-uta, le tiakono o Tafafuna'i Aialii Anapu: O le tupe faavae o le galuega sa maua mai i le Lūlū sa laugatasia ai Matafale taitasi ta'i \$5,000 na maua ai le \$165,000, o le Leitiofoni na maua ai le \$71,000+, o lafoga ipu na maua ai le \$85,000+, o Laulau Totogi (Corporate Tables) e \$103,120, o asiga o le galuega e \$16,000, o isi fesoasoani na maua mai ai le \$8,000, o le po siva e \$67,610, faatasi ma isi auala na maua ai le sao o le Ekalesia mo le galuega e \$703,559. O tupe mai mafutaga a alo ma fanau i Aukilani e \$200,041, o Sini Ausetalia e \$296,725, ma sii alofa a aiga ma taalolo i lea aso e \$263,700, e maua ai le aofaiga e \$760,466.32.

O le tau atoa o le galuega e **\$1,527,372.89**. O tupe sa aitalafu mo le galuega e aofia ai nonogatupe mai le Faletupe Tagatanuu o Samoa (NBS) e \$250,000, mai le NPF e \$400,000, ma le Toomaga i le Ekalesia e \$38,000, o le aofaiga o Aitalafu e \$688,000. Ma o se tala fiafia o lea aso e tusa o le saunoaga a le Failautusi, ua mamā uma lenei aitalafu pe a mae'a ona totogi i tupe na maua e pei ona ta'ua i luga, e le'i aofia ai le ma'au o le Ekalesia ma le mamalu o le ‘au valaaulia i lea lava aso. O le feau faaleagaga e ala i le Lauga, na fa'aaogā ai le Tusi Faitau o lea Aso Tofi ma lona Manatu Autū, o le Ta’umātuaina. O Hosea na valaauiina e le Atua ina ia faiavā i le fafine talitane, ma fai le fanau a le talitane, e fai ma faatusa o le alofa tulituliloa o le Atua i lona nuu e ui ina latou lafoa'i o Ia ae mulimuli i tupua faapaupau. O Hosea ua ta’umātuaina e pei o le Atua ma lona alofa i lona nuu. O lenei foi galuega tele o le malumalu, ua faia i le faatuatua faatagata matua, o le Faafeagaiga ma le Faletua, le Ekalesia i Saanapu-uta, ua ta’umātuaina mo auga tupulaga mulimuli mai. O lea foi se faaopoopo a le susuga i le Toeaina sa taitai le sauniga - o le galuega tele ua tū le failā, e lē o se galuega e faia e ni tama valevale, ae o tagata ua ta’umātuaina le tōfā, le uta ma le faatuatua. Na taualuga le aso i le tausamiga tele ma fa'aaloalogia maualuluga masani. Ia i le Atua le viiga e faavavau, seanoa o Ia e lē taunu faamoemoega.

## **FONO USUFONO FONO TELE**

O le Aso Lulu 24 Fepuari 2021 na usuia ai le Fonotaga faapitoa a le mamalu o Usufono o le Fono Tele 2020 i le Maota o Tupulaga EFKS i Mulinuu. O lenei fonotaga sa tālo e le Laulau o le Fono Tele, ina ia saili le tofa ma le faautaga a le Fono Tele, le fono sili o i ai le pule i le faatautaiga o le sa o le Ekalesia, mo se mataupu taua tele e a'afia ai lona faavae. O lenei mataupu e faasino i le fa'aaoagāina o le auala o fesoootaiga faatekonolosi e ta'ua o le ZOOM, e faatino, faasalalau ma fesooota'i ai taualumaga o le Fono Tele. O le auala lenei sa muamua ona fa'aaoagā i le tulaga faata'ita'i, i le fonotaga a le Komiti Mataupu Tau Aufaigaluega (Komiti Au Toeaina) ia Iulai (Sulu Samoa Julai 2020), sa mafai ona auai mai ai sui o le KMTA o Matagaluega i fafo, sa le'i mafai ona malaga mai i Samoaona o tapu ma puipuiga o le faama'i Koviti-19. Sa molimauina le aogā ma talafeagai o lenei auala - o meaalofa a le Atua i nei auga tupulaga mo le fa'aualualu i luma o feau o Lona malo. O lea na a'e ai le tofa ina ia faapea ona fa'aoga foi lenei auala o le ZOOM i le Fono Tele Faafuase'i 2020, ma nisi fono/mataupu tāua pei o le Ta'utinoga A'oa'o Malua 2021, e mana'omia ai le auai mai o Tamā usufono a le Komiti.

Ui i lea, talu ai ona e lē o i ai se faatagaga a le Faavae o le Ekalesia mo lenei faiga, o le ala lea na manatu ai le Laulau Fono Tele, ina ia saili le finagalo o le Fono Tele pe na te lagolagoina pe leai. O lea na valaauiina ai sui usufono o le FTF 2020 mai Matagaluega ma Komiti, ina ia saili le 2/3 (lua-vae-tolu) o usufono: (i) Pe fa'aoga le ZOOM i le Fono Tele 2021? (ii) Pe fa'aoga le ZOOM i le Iiloiloga o le Faavae 2021? O le i'uga o lenei fonotaga e ala i le palota: **(i) Ua pasia le fa'aaoagāina o le ZOOM i le Fono Tele 2021; (ii) Ua lē pasia lona fa'aaoagāina i le Iiloiloga o le Faavae 2021.**

Sa faasolo taualumaga o le Fonotaga e pei ona masani ai. Na amata i le tapuaiga sa ta'ita'iina e le afioga i le TaitaifonoFono Tele, susuga Tunumoso S. Iosia FT, ona soso'o ai lea ma le Tauvalaauga o sui usufono uma i Samoa nei ma Matagaluega i fafo, sa faatautaia e le Failautusi Aoao. Na mae'a le malologa puupuu, ona sauni lea mo le mataupu autū o le fono - o le sailiga lea o le 2/3 o usufono e ala i le palota. Sa muamua ona folasia finagalo fa'aalia, mai nisi o Matagaluega, ina ua maua le avanoa mai le Taitaifono, ae mulimuli ai faia le palota ma faia ai le faai'uga e pei ona ta'ua i luga. Malo le faatofala'i!

## **LAUGAASO LULU LEFULEFU**

uma na faatoilalo, ona ave uma lea o le vaega e ta'ua o le kulimi o le malo/cream of the nation: le au popoto, le au malolosi, le au talenia – ave uma i Papelonua e atia'e ai lona malosi faafitafita. E lē gata la ina ave ese tagata ma oloa, ae ua faatafuna'i foi le aai o Ierusalem, le malumalu ma ona pa, le maota o le tupu, falea'oga, falema'i, fale gaosi oloa, na matuā olopaina Ierusalem. O foliga o se tuugamau. O lagona foi o soo se Isarael i lea taimi, o lagona o le tuugamau, o le pogisā, o le tagi, auē, ma le faanoanoa, o le otī, ua leai se saolotoga, leai se fiafia, leai se faamoemoe.

Taimi ia na vaaia ai e Esekielu le fa'aaliga i Ivi Mamago. Na valaaau le Atua i lana perofeta, ua na ave o ia i le fanua sa tumu i ivi o tagata otī, o ivi ua matuā tele na'uā, ua paepae ma salalau solo, ma ua matuā mamago lava. Na faatonu e le Atua Esekielu, ina ia vavalō atu i ivi, ma fai atu i ai, Ivi mamago oe, faalogologo mai ia i le afioga a le Atua. Sa faapea ona fai e Esekielu. Ua vavalō atu o ia i ivi, ona gāsēsē lea, ua gāoioi ma fesooota'i ma maua ai auivi. Na sosoo ai ma le tutupu o aano, o uaua ma maso, sosolo ane i ai ma le pa'u e ufiufi ai, faapea lauulu. Ua taatitia mai o tagata atoatoa. Ae paga lea, ua na o se laasaga muamua, ae lē o i ai se ola. Ona toe faatonu lea e le Atua o Esekielu ia vavalō i le matagi, Vavalō atu ia i le mānava, Ona vavalō lea o le perofeta i le matagi/ mānāva, ina ia agi mai, mai matāmatagi e fa, ia ulu i totonu o nei tagata fāsia, e mānava ma ola ai. Ua pa'i atu le savili/mānava, ona ola ai lea ma ua tutū i luga i o latou vae, o le itutaua e matuā toatele lava. Ona fetalai lea o le Atua ia Esekielu, e pei ona fai mai le matua, *"Le atalii e o le tagata, o ia ivi o le aiga uma ia o Isarael; faauta, ua latou fai mai, Ua mamago o matou ivi, ua faaumatia lo matou faamoemoe, ua fano lava i matou."*

O le fa'aaliga lea ua faatusa i ai le soifuaga, ma lagona o le nuu o le Atua i taimi o le tafeaga. Ae sili ai ona faasino i le faaolataga ofoofogia o le a faia e le Atua mo ona tagata. E pei ona sa faia i ivi mamago, e faapea ona toe lagaina e le Atua lo latou toilalo, lo latou puapuagā, la latou tafeaga, e lagaina o latou tuugamau; e toe lalaga faamoemoega, ma toe ave i latou i lo latou nuu, o lauelele o Isarael. E toe faaolaina mai le otī ma le puapuagā. E toe faafoisia i le tulaga maualuga sa i ai, ma sili atu foi. E tuuina foi e le Atua lona Agaga i totonu ia te i latou, e ola ai ma faanofilemuina ai i latou i lo latou lava nuu moni. O le vavega e faia i le alofa o le Atua, i Lona mana, i

Lana pule, i Lona lava taimi, i ana lava auala, ae na te fa'aaogā ai soo se tasi ma soo se malo, e faataunu ana fuafuaga mamana. There are times when we live in situations like Israael in the exile. When our lives are like dry bones – feelings of loneliness, fear, pain, and hopelessness. When we experience the disgrace of failure and the agony of defeat. It could be the consequences of our own misconduct and sinful acts in the society. Or when we become victims of abuse and betrayal, in our relationships with other people like class mates, staff members, even our married spouses. Or when a loved one is diagnosed with cancer, aids or the covid-19 virus. During such times we feel lost, empty, frustrated and hopeless. In times like these, some turn to alcohol and drugs as antibiotics, others turn to violence, still others cannot handle the pressure and so commit suicide.

E i ai taimi e foliga mai ai lo tatou lalolagi ua faatafea i nuu faapaupau, o se fanua tumu i ivi mamago. Ua mago le ola faaleagaga; ua mago le ola matata'u ma faatuatua i le Atua. O lo tatou lava lotoifale, ua faateleina soliga tulafono, o amio matagā a le au matutua, ma amio lē pulea a tupulaga talavou, e tutusa ai alii ma tamaita'i, pei ona molimau Tanumalala, Vaiaata ma Oloamanu.

O aiga ua lē maua se filemu ona o le sailiga o le pule. O nisi aiga ua fāoa faamatapoto e tagata ese a latou measina, o suafa ma eleele. Ae a upufai o malo o laualuga i lenei taimi? Paga le faanoanoa i sailiga masei, faamasinosino ma tu'ua'i e le tasi le leaga i le isi, o faiga pi'opi'o ona o le tuinanau i le paoa ma le tupe, o auala amiolētonu e saili ai tofi, ae a tula'i mai, ua ta'u fua le suafa o le Atua, o lona finagalo lea, o lana tofiga. Ua mago le soifua matata'u i le Atua; mamago ai le tofa ma le faautaga. Pe mata e mafai ona toe faafoisia i se lelei? I lenei foi tausaga faalea'oa'oga ua tatou savalia, i sailiga malo mo le poto ma manuia, e i ai aso o le a lē taugalemu ai, e i ai taimi e lē o gatas i le futia ma le umele, auā e lē moe le fili, e lama pe a le tiapolo. A o lea lava foi e siomia i tatou i le mata'utia o le Faama'i oti o le Koviti-19. O le a tuu i tatou i le vanu o ivi mamago, o le a tatou fetaia'i ma tuugamau i le ala, i le fefe ma le atuatuval, o le leai o se faamoemoe. O le a se tali? E i ai se fofō? E faapefea ona toe faafoisia le malosi ma le faamoemoe ola? Ua fetalai Iesu, *'Ia outou o mai ia te a'u, o outou uma o e tigaina ma mafatia i avega, o a'u foi e malolo ai outou. Ia outou fa'aa'oa'o ia te a'u, auā o a'u le agamalū ma loto maulalo, ona maua lea e outou le malologa mo outou agaga.'*

O le tali lea o soo se puapuagā, o le fofō o soo se faafitauli - o Iesu Keriso. O le Mesia, ua taunu ma faasino uma i ai valoaga ma perofetaga a Iutaia, la latou tapuaiga ma lo latou tala faasolopito. O le fa'aaliga i ivi mamago, o le valoaga i le toe a'e o le tafeaga; e faasino i le toilalo o Papelonia i tausaga mulimuli ane, ae toe faasaoloto tagata Israelu, toe foi i Ierusalem ma lo latou nuu moni. O le faaolataga ma le saolotoga na fai e le Atua, i lana pule na fa'aaogā ai Kuresa le Sili, ma le malo o Metai ma Peresia, e faataunu ana fuafuaga. O le valoaga lata mai lena. Peitai, o le fa'aaliga foi, o loo valo'ia ai le faaolataga e silisili atu, ma aoao tetele e lē gata mo Israelu, ae mo le lalolagi atoa. Le faaolataga e le'i fa'aaogaina ai se tagata, ae o le Atua lava Ia, na matua afio mai, e ala i Lona Alo pele o Iesu Keriso. O le faaolataga mo le lalolagi agasala, ua mamago ona o le malosi o Satani ma ana 'au. Na faatoilalo e Iesu, i lona maliu tiga i le satauro. O lona toto na maligi mai, ua faamamāina, faamagaloina ai a tatou agasala uma. Ma lona toetu manumalo, ua faasaolotoina ai tatou, ma toe ave i tatou i lo tatou nuu moni, le ola faavavau i le Lagi i Luga. Ua fa'aaupegaina foi i tatou i taimi uma, i lona Agaga Paia ua liligi mai. Lea ua valaau mai o Ia, *"Ia outou o mai ia te a'u... ona maua lea e outou le malologa mo outou agaga."*

Le au uso pele ona o Iesu Keriso, ma le fanau a le Atua, ua toe faamanatu mai le feau o le Tala Lelei, ua faasino mo lenei Aso Lulu o le Lefulefu, e leai se mea e faigata i le Atua. With God nothing is impossible. We only need to repent of our sins and our evil ways, and believe in Jesus Christ, and we shall find that resurrection and new life, is only a breath away. Salamō ma faatuatua ia Iesu Keriso. Ia manatua foi, o tagata fou na fausia mai ivi mamago, o le itu taua e matua tele lava; o fitafita, auupega ma taulaga ola e i ai lana misiona ua valaaui a; e lē o ni tagata tafafao solo i le laueele, a o e ua faafoisia le ola, ua toe faafouina le taule'ale'a e faapei o le aeto. Pe afai ua toe faafoisia oe, ua toe faaolaina oe, ona avea lea o oe ma a'u e fa'aaogā e le Atua mo lana galuega faaola, e avatu le faamoemoe mo isi uso ua tauau ina mamago, e ala i la tatou molimau, ae sili i le amio, ua mulimuli i tulaga aao o Iesu. Ia faamanua le Atua i le alo faiva i a'oa'oga o lenei tausaga. Ma ia ia te Ia le viiga e faavavau. Amene.

(Saunia Faatonu Sulu)

**TU'UFA'ATASIGA O LE FAIGA-TAULAGA 2020**

Page #	MATAGALUEGA	T/SAMOA 2020 F/MAUGA OFISA 2019	TISAMOA	TINU'UESE 2020 F/MAUGA OFISA 2019	TINU'UESE F/ATMF 2020 2019	T/ATAUMAFAI F/MAUGA OFISA 2019	T/ATAUMAFAI F/MAUGA OFISA 2019	T/AI 2020 F/MAUGA OFISA 2019	T/AUFOELO F/MAUGA OFISA 2019
1-2	APIA SASAE	1,387,892.64	1,248,584.48	515,613.00	463,365.00	61,592.80	57,214.73	59,812.60	55,789.33
3	APIA	690,262.12	665,795.94	295,007.60	265,169.60	32,216.80	35,112.15	34,214.70	35,674.45
4	FALEATA	756,804.19	720,407.83	393,465.00	367,845.10	68,866.60	65,577.60	68,611.40	65,582.20
5	MAIUA	547,075.48	469,352.80	249,701.00	205,564.00	14,596.40	14,222.20	14,874.80	14,690.00
6-7	A'ANA	806,169.39	821,402.27	342,972.00	328,775.00	29,890.00	29,371.50	29,975.00	29,437.50
8	FALEALILI, SAFATA & SIUMU	798,467.91	736,851.06	358,631.20	330,985.90	26,519.30	26,896.30	25,513.70	25,391.80
9	LOTOFAGA, LEPAA & ALEIPATA	385,351.00	367,605.90	129,345.00	118,131.00	19,253.00	19,249.40	20,023.00	20,405.40
10-11	FAASALELEAGA	1,952,856.00	1,937,415.67	460,665.00	364,772.40	48,236.60	42,123.70	48,692.30	41,495.00
12-13	ITUO TANE	936,864.82	750,639.12	367,235.00	296,910.20	21,643.10	20,589.00	22,993.10	21,407.00
27	AULOTU POROTESANO	10,600.09	12,500.91	3,900.00	3,470.20	-	-	-	-
27	KOLISI FAFAIFEAU MALUA	334,065.00	233,422.70	163,837.40	154,435.00	500.00	500.00	500.00	500.00
27	KOMITI FAAMISIONARE	-	-	160.90	1,498.40	-	-	-	-
27	KOMITI O ATINAE	-	7,000.00	-	4,226.90	-	-	-	-
	AOFAIGA (SAMOA):	8,609,408.64	7,973,978.68	3,221,533.10	2,906,148.70	323,314.60	310,856.58	325,210.60	310,372.68
14-15	AUKILANI	982,079.30	849,172.20	432,863.53	443,992.78	44,728.90	37,022.00	45,626.89	39,162.60
16	MANUKAU	1,816,653.62	1,719,153.59	608,169.12	630,353.03	62,488.90	62,998.54	56,443.32	52,845.43
17-18	NIU SILA I SAUTE	1,029,025.98	934,405.55	460,474.84	428,423.85	60,193.21	57,653.61	60,357.20	56,208.99
19	KUNISELANI	135,329.06	85,731.08	96,375.47	70,108.99	8,476.31	6,481.26	8,476.31	6,481.26
20	KUNISELANI SAUTE	238,412.61	164,255.69	173,252.74	121,823.41	10,548.98	8,566.87	10,548.98	8,566.87
21	NIUSÄUELESE SISIFO	486,184.94	327,800.04	346,119.55	252,527.07	16,974.96	12,712.92	16,974.96	12,715.38
22	NIUSÄUELESE	427,546.95	316,594.45	302,545.36	237,931.99	27,785.25	22,685.07	32,402.73	23,802.06
23	VITORIA	673,842.05	519,882.05	343,584.77	277,366.50	25,680.90	23,148.48	26,246.95	23,293.33
24	HAWAII	138,532.17	118,429.83	32,535.97	31,340.41	5,232.86	4,480.12	5,232.86	4,480.12
25	AMERIKA	241,917.94	296,356.88	67,844.19	72,077.92	12,272.87	11,982.77	12,272.87	11,982.77
26	IERRUSALEM FOU (AM SAM)	63,925.04	34,764.15	39,059.45	18,791.85	3,032.02	2,653.75	3,032.02	2,653.75
26	AULOTU'SIWA	2,131.26	244.02	6,209.86	5,235.04	-	-	-	-
	AOFAIGA (O/SEAS):	6,235,580.92	5,366,789.53	2,909,034.85	2,589,972.84	277,415.16	230,385.39	277,615.09	242,192.55
	AOFAIGA :	14,844,989.56	13,340,768.21	6,130,567.95	5,496,121.54	600,729.76	561,241.97	602,825.69	552,565.23
	AOTELEGA:	2020 : \$ 2019 : \$	14,844,989.56 13,340,768.21	2020 : \$ 2019 : \$	6,130,567.95 5,496,121.54	2020 : \$ 2019 : \$	561,241.97 561,241.97	602,825.69 552,565.23	
	Fasiliga :	\$ 1,504,221.35	Fasiliga :	\$ 634,446.41	Fasiliga :	\$ 39,487.79	Fasiliga :	\$ 50,260.46	
	TU'UFA'ATASIGA FAIGA TAULAGA	2020	\$ 22,179,112.95	2019	\$ 5,496,121.54	2019	\$ 561,241.97	2019	\$ 552,565.23
	Fasiliga	\$ 19,950,696.95	Fasiliga	\$ 2,228,416.00	Fasiliga	\$ 39,487.79	Fasiliga	\$ 50,260.46	

## **NA O AFIOGA E TULEI MAI FOFOGA O LE ALII**

### **O le Malosi e ala mai le Fefaaasoaa'i**

*Galu.19, “<sup>18</sup>Ua o mai foi i latou e toatele o e ua faatuatua, ma fa'aali mai ma ta'u mai a latou amio.”*

Na tuu e Iesu le pule i ona soo e faalogo atu ai i tautinoga a tagata ma folafola i ai le alofa tunoa. “<sup>23</sup>O i latou uma lava tou te faamagaloina ai a latou agasala, e faamagaloina ai ia i latou; o i latou uma lava tou te tuu pea i ai a latou agasala, e tuu pea lava ia.” *Ioa.20.* E i ai se faamamāina faaleagaga e tuuina atu pe afai e alu atu se tasi luga fesaga'i ma fai atu sa'o ia te oe, ‘Ua faamagalo oe e le Atua, ua ou faamagaloina oe, o lenei ia e faamagalo ia te oe ma savali i le faamagaloga a le Atua.’ O le faamagalo o loo i ai se malosi ese na te mafai ai ona amatamea i le faamalologa. Fai mai Iakopo, “<sup>14</sup>Ua ma'i ea so outou? Ina aami atu ia toeaina o le Ekalesia, ia latou tatalo mo ia, pe a uma ona faau'u ia te ia i le suā'u i le suafa o le Alii. <sup>15</sup>O le tatalo foi e faia i le faatuatua e faaolaina ai le ma'i, e faatuina foi o ia e le Alii; afai foi ua agasala, e faamagaloina ia. <sup>16</sup>O le mea lea ia fetu'uta'ua'i a outou agasala, ma tatalo le tasi mo le tasi, ina ia faamaloloina outou. Ua aogā tele le tatalo faatauanau a le tagata amiotonu.: Iako.5.

E taua le i ai o meaalofa, ae sili ona taua le fa'aoga lelei ma faasoa atu mo le manuia o le isi. O le fesua'i o avega ma le tufa atu o meaalofa o loo fautuaina mai e le aposetolo. “*Ia outou fesui ia outou avega e ave...ia tufa atu mea lelei uma lava...ia tatou agalelei i tagata uma lava, ae maise i le aiga o le faatuatua.*” *Kala.6:2,6.10.* Ua faatuputeleina ma faaleleia atili auala o fesootaiga o nei aso; o auala e fefaaasoaa'i ma faasalalau ai mafaufauga ma talitonuga o tagata taitoatasi. E mafai ona fa'aoga lelei nei auala e fetufaa'i ai, e faamauina ai tautinoga o agasala ma folafolaga o faamagaloga. Ae o le auala sili o le fesaga'i lelei e fesui, faasoa ma fefaaamagaloa'i. O le agaga o le mulumulu'aufoe ma ooloolo pitovaa, e tau fai maua ai le malosi fou e aga'i pea i luma. O le tiute o le gasegase e tula'i, savali ma saili le fofō. E faapea i le sailiga o le faamagaloga, ina ia amatamea ma taulamua. Ma afai e te lē o mautinoa poo ai e tatau ona e talanoa i ai, po o ai e te talitonuina, e fautuaina le amata i lou faifeau ma lona faletua, po o se foma'i faapitoa ua a'oa'oina lelei i le galuega faufautua/faamafanafana.

### **O le alofa tunoa e lagolago (Sustaining grace).**

*“O lo'u nei alofa tunoa e lava lea e fesoasoani ia te oe.” 2 Kori.12.*

E lua ituaiga alofa tunoa: (i) *O le alofa tunoa e faaola.* O le taimi lava e te talitonu ai ma faatuatua ia Iesu Keriso o Ia o lou Faaola, o le taimi foi lea e sōloiese ai e le Atua faamaumauga uma o au agasala. (ii) *O le alofa tunoa e lagolago.* O loo tusia e Paulo faapea, “*Sa tuuina mai ia te a'u le mea matuitui i le tino...<sup>8</sup>Na ou aioi faatolu atu i le Alii ona o lea mea, ina ia alu ese ia te au. <sup>9</sup>Ona faapea mai ai lea o ia ia te au, ‘O lo'u nei alofa tunoa e lava lea e fesoasoani ia te oe; auā o le vaivai e fa'aatoaina ai lo'u mana.*” *2 Kori.12.* O se faatusa e manino lelei. O se mea matuitui ma talatala e tuia ai le pa'u manifinifi ma nofo ai i le va ma le aano. Soo se taimi e laa ai i luma e lagona ma faamanatu mai lona tiga i le talatala. O le tama itiiti i le nofoaga e toe fuata'iina ai amio. O le vaitusi lanu mūmū i le api aitalafu. O soligatulafono o loo faamauina i ofisa o le malo. O le galala i le fia inu i se pia i le ogatotonu o le aso. O loimata i le tuleva o le po. ‘Le Alii e, se'i ave ese lenei tiga..’ Ae na o le pau le leo e te faalogoina, ‘*O lo'u nei alofa tunoa e lava lea e fesoasoani ia te oe.*’ O le alofa tunoa e lagolago mai na te folafolaina mai, e lē o le leai o se tauiviga, ae o le auai mai o le Atua e faamalosi'au. O Ioane Niutone, le faifeau Agelikana ma lē sa aafia muamua i fefaatauaiga o pologa, na ia tusia le pese laulioa o le ‘Alofa Tunoa Ofoofogia’ (Amazing Grace), na ia maumautaia le lava o lenei alofa tunoa o le Atua. O le aso na maliu ai lona faletua ia Maria, na ia maua le malosi e lauga ai i le Aso Sa. O le aso na sosoo ai na ia asiiasi ai i tagata o lana aulotu, ae mulimuli ane ta'ita'i toe sauniga o le faletua. Na ia toe manatunatu i ia aso ma na ia tusia ai: ‘*O le Faletupe o Egelani e matuā mativa e faatumuina le gaogao faapenei ua ou maua ai. Peitai le Alii, le Atua e lava ma atoatoa, e fetalai o Ia ma faia loa. O i latou uma e iloa o Ia, ma latou talitonu ia te Ia, ia latou loto tetele. Na te mafai ona avatu le malosi ia i latou e tusa ma o latou aso. Na te faateleina lo latou malosi, a o tupu pea o latou puapuaga. Ma o mea uma na te mafai ona faia, o mea lava ia ua Ia folafola mai na te faia.*’ O loo avanoa pea lenei alofa tunoa mo soo se tasi, e mafai ona fai mo oe pe afai e te manaomia moni.

## O A TATOU MEA E ‘AI E TATAU MA LE ASO

Aso Sa, 21 Fepuari 2021

### E fua mai i ona lava tau.

Tusi Faitau: Salamo 1, “<sup>3</sup>*O ia foi e faapei o le laau ua totō i tafatafa ane o vaitafe, e fua mai ona fua i ona lava tau; e lē to’ulu foi ona lau; e manuia foi mea uma na te faia.*”

A o o’u nofo ifo i lalo e manatunatu i le faitauga o lenei Aso Sa, ou te lagona le momo’o i totonus ia te a’u i le fia avea ma ‘la’au e totō i tafatafa o vaitafe’, o loo faamatala e le Fai Salamo iinei. O lenei vaaina faa-faatusa na te faaosofia lagona o le to’afilemu, onosa’i ma faapalepale, ua laulelei le tagata atoa; ma e mafai e lenei vaaina ona lagona mamaao ese mai la tatou malaga faale-faatuatua. E faapea foi, o falelua amiontonu/pi’opi’o ua ofoina mai mo tatou iinei, e masani ona lē lagona le lautele e tatau ona i ai e gafatia ona taofi le lalolagi lavelave ma felefele ua tatou iloa. Ou te iloa ou te lē mafai ona pei o tagata faatuatua o ta’ua i nei faitauga; o lo’u olaga faaleagaga e fenumia’i ma faalētonu. Sa ou faamoemoe ia ‘aua ou te pi’opi’o, ae mautinoa lava ou te lē amiontonu foi i le tele o taimi. Ou te fiafia i le tulafono a le Alii? Ae ou te malamalama i le uiga o lena mea? O le a le tele o so tatou naunau mo se mafutaga vavalalata ma le Atua, o le a foi lo tatou taumafai malosi e faatinu lena olaga, ae o le mea atoa e lē faigofie. O faitauga o lenei vaiaso o loo tulimata’i po o le a le uiga o le maua’ma ola a’e i lo tatou avea ma soo i lenei vaitau o le Leni; ia tatou faimalaga faatasi ma i latou.

† Iesu e, le Vai Ola, faatasi mai nei mo i matou a o matou saili atu i lau Afio, faasūsū i matou i lou alofa, lu’itauina i matou i lou poto. Amene.

Aso Gafua, 22 Fepuari 2021

### O se feagaiga fou

Tusi Faitau: Ieremia 31:31-37. “<sup>33</sup>*A o lenei le feagaiga ou te osia ma le aiga o Israel, pe a mavae ia aso, o loo fetalai mai ai le Alii, ou te tuuina la’u tulafono i totonus ia te i latou, ma ou tusi ai i o latou loto; e fai foi a’u mo latou Atua, o i latou foi e fai mo’u nuu.*”

O le gagana o le ‘tulafono’ e mafai ona lagonaina lona mamafa. Susu’e faasolo i le Feagaiga Tuai ona e iloa lea o faaputuga itulau i le gagana o faatonuga e faigatā ona ‘auāsa ai. Uu i lea o le Tusi Paia e le’i avea o se tusi o faatonuga, ma o le faitauga o lenei

aso o loo fa’aataata mai ai, o le tulafono o se mea e musumusu mai totonus, pe afai tatou te faalogo lelei. I le Mataio 22, o loo a’oa’o mai ai Iesu, o le alofa i le Atua ma le alofa i le tuaoi, o poloaiga ia e 2 o loo tautau ai le ‘tulafono atoa’. O lenei faamamāina o le tulafono e avea ai le alofa e faaliliu i faatinoga, o se mea ua fesoasoani tele mai ia te a’u e fesoota’i ai i se auala loloto, ma le tele o faitauga o lenei vaiaso ae maise o le faitauga o le asō. Ina ua tatou fifilemu, ina ua tatou faataga i tatou e fesoota’i ma le alofa o le Atua ia i tatou, ona tatou fesoota’i foi lea i le tulafono lenei ua tusia i o tatou loto. O le ‘tuuina o le nila o tatou laau faalogologo’ i lenei fesoota’iga, o se lu’itau tele: e faapefea ona tatou faia o lenei mea? Mo a’u, e i ai le faasino fesoasoani, o loo i upu ‘E fai foi a’u mo latou Atua, o i latou foi e fai mo’u nuu.’ Pe afai e taumafai e avea ma soo, e faigofie ona pa’ū atu i le tulaga o le ‘fa’aliga o le pa’ia’. Tatou te taumafai e fai amio tatou te manatu e fai e se tagata paia, peitai e lē o le mea lena o loo mana’omia mai ia i tatou; e ao ona tatou avea le Atua o Ia o le Atua – tau ina avea i tatou mona nuu. Tau lava o se tagata. Pau lava lea o le mea mana’omia ia te a’u; le tulaga tonu lea ou te i ai nei. Pe afai ou te alu i le Atua ma le loto e avanoa mo lona alofa ma lona taliaina o lo’u tulaga tagata, o iina ou te maua ai le loloto o le fesootaiga.

† Le Atua e, pe a ou lailoa i le fia sili atu, fesoasoani mai ia ou avea pea ma a’u. Amene.

**Mo Mafaufauga Atili:** O le a le uiga ia te oe o le ‘alofa i lou tuaoi e pei o oe lava ia te oe’? E faapefea ona e olaina lenei tulafono i le asō?

Aso Lua, 23 Fepuari 2021

### Onosa’i i lo tatou ola tuputupu a’e

Tusi Faitau: Salamo 92, “<sup>12</sup>*E tupu olaola le tagata amiontonu e pei o le pama; e tupu tele e pei o le arasi i Lepanona. <sup>13</sup>*O e ua totōina i le fale o le Alii, e tupu olaola i latou i lotoā o lo tatou Atua.*”*

I le faitauga o le asō ua tatou toe fetaia’i ai foi ma le lua-fuli-tua o amiontonu/amioleaga; o se mea e lē fetaui ma lo tatou malamalamaaga o i tatou po o le lalolagi lautele. E fesoasoani ia te a’u le ave o lenei ata ma tuu i lena talaaga mautotonu. Ou te mana’o e avea ‘tagata fai amioleaga’ ma ‘amiontonu’ o ni tu’inanauga i totonus o a’u; e ao ona ou folau ai i lo

---

## O A TATOU MEA E ‘AI E TATAU MA LE ASO

la’ua va. E tele vaega laulelei ma atoatoa o lo’u tagata ou te faalagolago i ai, ae i ai foi nisi vaega faavalevaled e fiafia e feosofi mai i luga i isi taimi. O le ata faatusa a le Fai Salamo ua na aumaia le faasinoala e iloa ai le tasi mai le isi. I le tasi itu o loo i ai tagata amioleaga, ‘e tupu olaola...pei o le vao iti’, a o le isi itu, o i ai tagata amiontonu, ‘e tupu olaola...e pei o le pama, e pei o le arasi’. O le vao iti e vave lona ola, tupu ma salalau solo, a o laau e umi le taimi e ola ai ma tupu ina ia matua. Na ou faalogo i se tasi faia’oga o ia faia le faaupuga, ‘o le agaga lelei na te aumaia, a o le agaga leaga na te avatua’, pe a talanoaina pe faapefea ona iloa le eseesege, o manatu/fuafuaga mālōlōina ma le lē mālōlōina. Ua toe faamanatu mai ai ia te a’u le faatusa o le vao/arasi i le faitauga o le asō. E masani ona valaauiina i le soifuaga i lona tumu, le ma’ale’ale ma le mumū mālie – mata latou te faasoesā ia te oe, ae latou te lē faanatinatia oe. I le taimi nei, o mea latou te ta’ita’i ese oe mai lou ausia o lou tulaga aupito lelei e masani ona lagona faanatinati, e pei o se mea ua e mana’o pe naunau e oo i ai. Pe afai tatou te mata’itūina nei lagona faaosofia ma iloilo o latou natura, e mafai ona fesoasoani mai ina ia tatou tutumau ma maua’ a i le Atua, e tupu ma ola a’e ai i la tatou lava saosaoa faifai mālie fuafua lelei.

† Le Atua e, ua e valaauiina i matou ia totōina ma tupu tālaulau i lou maota. Aumai ia i matou le onosa’i ma le malamalama ina ia tuputupu mālie a’e ina avea ma tagata fua taufeti’iti’i. Amene.

**Mo Mafaufauga Atili:** O i ai se itu o loo ia tosoina atu oe, ua malemo i mea o loo latou aveina oe? E faapefea ona e toe faaleleia lenei lē paleni?

Aso Lulu, 24 Fepuari 2021

### O le auai o le Atua ia tatou sailiga

Tusi Faitau: Salamo 119:9-16, “<sup>10</sup>Ua ou saili ia te oe ma lo’u loto atoa; ‘aua nei ou sesē i au poloaiga.’”

O le faitauga o le asō e mai le Salamo 119, e 176 ona fuaiupu ua avea ai ma salamo aupito umi i le Tusi Paia. E ui lava ina e pei e faigofie la tatou fuaitau, peitai o le isi vaega tele o le salamo o loo latou aumaia se ata e ese. O le fai-salamo o loo manino mai lona tauivi ma se avega tele, ua lagona le tafea ese mai le Atua ma o loo faananau mo se mafanafana faaleatua. O le mea atoa e foliga mai i le tele o itu, o se

faaolooloma’au mo se toe faafouina o sootaga, mo se fe’umiaiga vavalalata sa masani ona lagonaina muamua. O lo’u iloa o le tulaga lea, ua fesoasoani mai i le tau tagofia o la tatou faitauga, semanū e logo mimita; o le faipule atoatoa o loo fai le lisi o mea uma na iloa ai lona ‘paia’ ma lona ‘tutumau’. Peitai e leai, e lē o lena. I le tele o auala, o se tagata o loo faia se lisi o mea o loo latou fia fai, ma mea uma ua latou folafola o le a fai, a o mulia’i lo latou valaau i le Atua e afio latalata mai ma fesoasoani mai. E te masani ai? Ia te a’u e toatasi, ou te lagona le pei o le fai salamo ma ou moomoo maimau e, se’i o latou o ese mai o latou lava ala, faatasi ai ma ala o le Atua. O le mafaufauga faapea ua tu’ua i tatou e le Atua, o lo’u malamalama, e lē o se mea e loloto tele lona moni. E mafai ona moni lona lagona; ioe, o le toatele o i tatou ua tatou uia lena gaogao i o latou olaga. Peita’i o le talitonuga faapea o loo i ai le lisi o amio lelei e tatau ona tatou faia muamua ae le’i afio mai le Atua, o se fausaga faaletagata atoatoa. O loo faatali le Atua i taimi uma, e faafetaui mai i tatou i le tulaga o loo tatou i ai. E mafai ona tatou faafeiloa’i le Atua ma o tatou loto atoa?

† Faafetai le Atua e, mo le vavega, a o matou lagonaina lou lē i ai, o lea lava e te auai ai.

**Mo Mafaufauga Atili:** O i ai ni auala o e auai ai, i le mataupu mo se sootaga ma le Atua, ae lē o le tagata atoa? E mafai ona sui au auala/faiga ina ia faamaonia le auai i taimi uma o le Atua i lou olaga?

Aso Tofi, 25 Fepuari 2021

### O le Atamai Loloto ma Maua’ a

Tusi Faitau: Faataoto 3:13 – 26, “<sup>25</sup>Aua e te mata’u i le fefe faafuase’i, ma le malaia o e amioleaga, pe a oo mai. <sup>26</sup>Auā o le Alii, e fai o Ia mou faatuatuaga; na te leoleo foi i lou vae, ne’i maua.”

Ilo’u olaga atoa faatagata matua na ou ola faatasi ai ma faalētonu faalemafaufau e oso soo ona o le popole. Ou te maloloina lava i vaitaimi uumi, ae te’i lava i le sasao a’e ma le mata’utia, e oo lava i le nofo a’e i luga o le moega ua tau lē gafatia. E leai se isi mea aupito sili lona faavaivaia o lo’u lagona maua’ a i le atamai ma le faatuatu, nai lo le lagona pogisā ma le tiga maamaai o le pa’i mai o le fememea’i. Ile Tusi faitau o lenei aso, o le poto o loo tautalagia e

## **O A TATOU MEA E ‘AI E TATAU MA LE ASO**

pei o se ma’ a tāua faamāneta; o se ‘laau o le ola’ na te puipuia i tatou mai fevesiaiga mai fafo ma totonu foi. E lē o le uiga o lo’u manatu ina ia avea lea e faafaigofie ma lē fesoasoani ai; o le fai atu i se tagata o loo oso le ma’i fefe ma atuuatuvale ‘ina ia faatuatua’, po o le faitau atu i ai o se fuaiupu mai le Tusi Paia e pei o se faitauga faamaneta, na te faaitiitia le mata’utia o le faalavelave o loo feagai ma lea tagata. O le isi mea, o nei tali atu e lua la te tau fai misia le aano moni, e faasino i le valaau i le poto loloto, ma le malamalamamaaga o le tagata ia te ia ma lona faavae. O le poto, e pei ona molimau le faitauga, sa i ai i le foaoaga (f.19); o le ‘laau o le ola’ (f18), o le ‘ola o lou agaga’ (f22). E faamanatu mai ai le faitauga o le Aso Gafua faasino i le tulafono a le Atua o loo ‘tusia i totonu o tatou loto’. O loo i ai se mea ‘ānoa loloto i totonu o i tatou e mafai ona tatou utuvai i ai i taimi o le sousou; o se mea e mafai ona tatou maua’ a tutumau ai, tusa lava pe tatou te lē lagonaina soo. O le mea moni lava lea, o le a tatou lē lagonaina! Peita’i o lo tatou iloa o loo i ai se poto e filemu, e malō ma mautū, maua’ a ma loloto, o loo i ai mo i tatou ma taumafai e galueaina lona auai i o tatou olaga, o lona uiga pe a oo mai taimi o le fefe ma fememea’i faafuase’i, o loo i ai se si’ufogoga mālū e filemu ma ititi, na te faarnālūina ma ta’ita’iina i tatou.

† Le Atua e, e ou ala uma e filemu, a’oa’o mai ia matou galueaina lou poto pe a matou malolosi, ina ia faamalosiina ai i matou i taimi o le vaivai. Amene.  
**Mo Mafaufauga Atili:** O a ni tulaga faalemafaufau ma faaletino e ta’ita’iina oe e faaitiitia lou maua’ a i le poto o le Atua? E i ai se auala e mafai ona e valaauinai ai le Atua i lena tulaga o lou lalolagi i totonu?

Aso Faraile, 26 Fepuari 2021

### **O le Avanoa e Fesili ai**

Tusi Faitau: Luka 2: 41 – 52, “<sup>46</sup>Ua mavae aso e tolu, ona la maua ai lea o ia o nofo i totonu o le au a’oa’o, o loo faalogologo ia te i latou, ma taufesili ia te i latou. <sup>47</sup>Ua matuā ofo uma lava e na faalogo ia te Ia i lona poto ma ana upu e tali.”

Ua ou faitau ma faalogo soo i lenei tala, ae oo mai nei faatoā ou iloa sa ou misia le faamatalaga o le mea tonu o loo fai e Iesu. Na ia nofo mo le fa aso i totonu o le malumalu faatasi ma faiaoga, “o loo faalogologo i ai ma fesilisili i ai.” Ou te vaaia i lo’u mafaufaufau le Iesu e sefulu ma le lua tausaga o loo inu ma le fiafia i le avanoa matagofie e ulufale ai i totonu

o misiterio sa ia manatunatu i ai. Pe toafia nisi o tatou matutua e mafai ona fesagai ma lo tatou faatuatuga i lea ituaiga naunautaiga tuu fesilisili? Ou te faalētonu pe mata tatou te lagona le saogalemu? I le tele o siosiomaga faa-Ekalesia, o loo maualuga ai le taofiofi mamau i mamalu ma faiga faavae ua masani ai, e lē gata i le itu faaleagaga, ae faapea foi le agafesootai, ma e oo i se tulaga faigatā lou fesiliglia o faiga faavae o ola ai, pe ofoina atu ni mafaufauga fou, e avea ma luitau poo ni faafitauli e ao ona togafitia. E tele lava mafuaaga eseese e ala ai ona tulai mai nei faafitauli poo toatūgā. Peitai o lea le tulaga e lafoa’iina feeseseaiga ma puipuia suiga: o mea e lua sa sili ona faauouo e Iesu. Mo le taimi nei, e i ai i latou o i ai ni fesili o talalī i le fia fai, ae fefefe nei avea ma ala e iloa ai lo latou vaavaa ma le vaivai.

A o tatou tamaitiiti, sa faamalosia i tatou e fesili ina ia malamalamama ai, ae a o tatou tuputupu ae, e i ai le faaeteetega ma le matamuli e fesili, ma tautino ai lo tatou lē iloa o le tele o mea. Ou te manatunatu pe toafia i tatou e alu le tele o le olaga i totonu o le Ekalesia, a o tuu fesilisili i mea e fefefe e fesiliglia? E mafai ona tatou faatupuina ni avanoa, e pei o ia avanoa sa tatala atu mo Iesu? Avanoa e fai atu ai fesili, ma tali ai fesili, ma faalogologo ai i tali o fesili? Ou te faamoemoe o loo tele ni avanoa o i ai; ou te manatu o le a tele ai ma loloto atili ai lo tatou va fesootai ma faiā ma le Atua, faapea le va feagai ai ma isi tagata.

† Le Atua e, Le o loo i tala atu o tali uma, matou te tuuina atu a matou fesili o lenei aso i lau Afio, ina ia e faafogaina ma e tali mai i lou onosa’i ma e tusa ma lou finagalo. Amene.

**Mo Mafaufauga Atili:** E faapefea ona e faia lau Ekalesia o se nofoaga saogalemu e fai ai fesili? E mafai ona fai se ‘Pusa Fesili’ e tuu i ai fesili a tagata lotu aunoa ma le tusia ai o latou igoa, ona fai lea o se talanoaga e tali ai nei fesili i soo se auala pei o luga o Lautusi o Foliga (facebook), mafutaga tatalo po o mafutaga su’esu’ e Tusi Paia?

E te lē o tuai, o maua pea lou avanoa. Afai o i ai ni mataupu faa le Tusi Paia, tau le faatuatuga, poo tu ma aga faa-EFKS e te lē o manino ai, ia fesili i lau faifeau e fiafia tele o ia e tali ma fesoasoani ia te oe.

## **O A TATOU MEA E ‘AI E TATAU MA LE ASO**

Aso Toonai, 27 Fepuari 2021  
**Teuteuina o fua o le faatoaga**

Tusi Faitau: Ioane 15:1 – 8, “<sup>5</sup>*O a’u nei o le vine, o la outou. O lē tumau ia te a’u, ma a’u ia te ia, o ia lava e fua tele mai; auā e lē mafaia e outou ona fai o se mea e tasi pe a a’u lē i ai.*”

O le tele o nai o’u mafaufauga faaleagaga o lenei vaiaso sa faamamafa le itu i o tatou lalolagi tutotonu. E tāua lo tatou su’esu’ e ma vāiliili nei loulouā i totonu o i tatou, ma ia maua ai nofoaga e afio ai ma faamautū ai le Atua. Peita’i ua mautinoa, o le faamoemoe o le maua’ a ma le tupuola, ia fua mai. O le faitauga o lenei aso ua faamanatu mai, o se vaega tāua lenei o le avea ma soo o Iesu. Ae o le ā lenei fua o loo fetalai i ai Iesu? O le ā le uiga o le fua mai o fua lelei e tatau ai? E pei ona lasi ma eseese ituaiga laau, e faapea foi i tatou e tofu le tagata ma se fua e ese mai isi, e ofoina atu i a tatou lava auala faapitoa tulaga ese ina ia manuia ai ma fafagaina ai isi.

O le fua mai, i lo’u manatu, o le tatalaina atu i le lalolagi, o le ofoina atu o a’u meaalofa ma le agalelei i isi tagata. Ina ua mafai e lo’u tagata i totonu ona maua’ a atili, ina ua ou mafanafana i lo’u iloa o a’u lava ma mautinoa le maua’ a i lo’u alofa ma le alofa o le Atua; o lena le uiga o lo’u fua mai. Peitai afai ou te taumafai e tuuina atu lo’u tagata i se tulaga maulalo, o le a ou vaivai ma amata ona solomuli mai le lalolagi. I Evagelia ua tatou tamaoaiga i faatusa e tele o Iesu, o le areto o le ola, o le vai ola: o le puanavai e asuvai ai ina ia fafagaina ma faafouina pea. O lona uiga afai tatou te fesoota’ i atu i lena, o le a faigofie ona tatou fua tele mai ma faatamaoaiga atili ai isi tagata. O la’u tatalo ia outou savalia lenei vaitau o le Leni ma fafagaina outou soifua faaleagaga i totonu, i le malamalamaga o le a fesoasoani atu i lau auauanaga e tautua ai i latou e pele ia te oe i lou aiga, lou nuu ma le lalolagi atoa.

†Iesu e, le vine moni, ia faasūsūina mai i matou ia mafai ai ona matou faasoa au meaalofa ma isi tagata. Amene.

**Mo Mafaufauga Atili:** O le a le fua e fua mai pe a maua’ a i le Atua? O le a le mea e te mana’ omia le fafagaina? E faapefea ona faasoa atu nei meaalofa i se auala e gafataulimaina?

**I TOTONU O LE LĒ MAILOA: O LE AGAGA FAASO’O - SAVAVALI IA TASI.**

Aso Sa, 28 Fepuari 2021  
**Luga o le ala**

Tusi Faitau: Levitiko 26: 3 – 13, “<sup>12</sup>*Ou te fealua’ i foi i totonu ia te outou, e fai foi a’u mo outou Atua, o lē na au mai ia te outou nai le nuu o Aikupito, ina ia lē fai outou mo latou pologa.*”

Afai sa i ai se taimi sa oulua talisua ai ma se pepe i le laulau’-ai, e lē taumate sa e lagona le fiafia tele i lona faapa’ū i lalo o se mea ae e toe pikiina i luga, toe togi i lalo ae toe piki i luga, ma fai ai lava faapea. O tamaiti pepe o ni saienisi ofoofogia; latou te faia i le tele o taimi ni su’esu’ega laiti. O se tasi o mataupu e fiafia tele i ai o le tofotofoina lea o le kalave, faatasi ma le onosa’ i o latou mātua. O le a’oa’oga e maua mai e pepe i lenei suesuega: soo se mea e tupu e i ai lona tuatuagia mulimuli mai ai. A o tatou tuputupu a’ e ma matutua, e fa’aaaua pea ona tatou sailili i lenei mataupu, a o faatupulaia lona lavelave.

I le Tusi o Levitiko ua tatou maua mai ai tuatuagia faalenatura e tafe mai le usitai. O tulafono o loo aumai e lē na o ni poloaiga soona fai. Ae latou te feasoasoani i tagata ina ia latou ola faatasi ma le fatu saito o le lalolagi, ma le faamoemoe o le Atua na foafolina ai. O le tuatuagia faalenatura o le usiusitai o tagata i poloaiga a le Atua, o le a latou tupu lauolaola lau-usiusi. Ae o le a latou olaina ni olaga e fua tele mai. O le folafolaga aupito silisili i nei poloaiga uma, o le Atua sa la faaolaina mai lona nuu mai le pologa i Aikupito, o le a la fa’aaaua ona malaga faatasi ma ona tagata. E mamao lava mai le avea o ni tulafono taufaamata’u, ae o nei poloaiga e avea o se taitaiala mo tagata i le soifuaga fuifuihua ma le Atua, o lona tuatuagia o se olaga e lausiusi, lanulauava ma fua taufeti’iti’i.

†Le Alii e, Iesu faafetai auā sa e savalia le lalolagi faatasi ma i matou ma folafola le Tala Lelei o Lou Malo. I le mana o le Agaga Paia, ia e savali faatasi ma i matou i lenei aso ina ia matou ola lauusiusi ai ma fua tele mai. Amene.

**Mo Mafaufauga Atili:** Toe iloilo le ala na savalia o lenei masina ua mae’ a, e faalelei atili ai le savaliga o Mati seja aulia le Aso Maliu ma le Toetu.

---

# **O E UA FAI I LAGI FOLAUGA**

## **ASOMALIU TUPUOLA TUSA MISI TUPUOLA (nee NAKISO)**

**(6/3/1953 - 20/2/2021) 67 + 11+14**

O le tina ia Asomaliu o le Tama'ita'i Tausi Soifua o le malo Samoa, o le Faletua o le afioga Tupuola Tusa Misi Tupuola, o le A'oa'o Fesoasoani i le EFKS Matautu, Pulega Falealili; a o le Komiti Tumau i le Ekalesia Metotisi i le Matagaluega Talimatau o le Sinoti Apia Sisifo, o lē sa fai ma Faipule o le Palemene mo le Itumalo Falealili i le paeaiga XV (2011-2016). O le gasegase o le kanesa na maliu ai. Na malaga e fai lona taotoga i Niu Sila i le faai'uga o le 2019, o le patu sa i lona māmā, e le'i iloa se kanesa; ae maua mai e alii foma'i Niu Sila o loo i ai le kanesa. Na fai ona togafitiga mo le 3 masina, ma toe foi mai ai i Samoa, a o amata puipuiga o le faama'i Koviti-19. Na faasolosolo mālie atu le vaivai o lona tino, auā sa stroke foi. Sa saili fofo a taulasea ma inu fuala'au ma talosia pea, ae na siliga tali i seu. O le itula 3.00 i le afiafi o le Aso Toonai, 20 Fepuari 2021 na tō ai lana mānava i lona aiga i Talimatau, a o si'omia e le tamā, le fanau ma lona aiga. O le susuga i le Tausi Matagaluega Talimatau ia Luteru Loli ma le Faletua ia Nu'uuli na fai le sauniga lotu ma le aiga, ma momoli atu ai lona tino i le Maota Maliu o Letoa Sefo Pa'u i Tafaigata, e faatali ai toe sauniga.

O le 4.30pm Aso Tofī 25/2/2021 na faia ai le Sauniga Lotu e le Pulega Falealili i le Maota Maliu. Na ta'ita'i le susuga Tunumoso Iosia FT, Taitaifono Fono Tele EFKS (o lana feau faamanatu, E le'i uma le ata ia Asomaliu, pei o Lasalo). Na auai le Failautusi Aoao & Teutupe EFKS; o To'alua Perese FS sa faiatou le Tusi Paia, o Kelekolio Sanele FS na saunia Tatako, a o Letone Uili FS na lauga. O le afiafi Aso Faraile 26/2/21 na aveeseina ai mai le fale maliu, ma momoli atu i le malumalu Ekalesia Metotisi Talimatau mo le Sauniga Faale'aiga. Na ta'ita'i le Tausi Matagaluega ia Luteru Loli, a o taulaga soifua a le aiga na latou lagolago i ai: o Piilua Sao FS (EFKS Lepuia'i Manono) sa tatalo, o Osa Leilua (Metotisi Vaipu'a) na faiatou Tusi Paia, ma a'u na faia le Lauga faavae i le TFA '*O le avanoa e fesili ai*'. Na molimau le ulumatua o Theresa Kini ma nisi o le fanau, o faifeau tausoga e i ai le Tausi Matagaluega Malolo ia Vito Lesoa. A o le tele o molimau i lea sauniga, o sui o le Matagaluega Soifua Maloloina sa latou galulue faatasi; o le susuga Papalii Dr. Samuelu Petaia o le Taitaifono o le Komiti Faatonu o le Faamamā

Fatuga'o, o le Asosi Tamaitai Tausi Soifua, o ana paaga ma lona aiga i le Acute 8. Na autasi molimau a le Matagaluega i se auauna sa faamaoni i ona tiute faa-tausi soifua, e mataala ma saunia i soo se taimi, o ona foliga lalelei mata fiafia e tali atu ai i mafatiaga o gasegase, sa avea o se vaila'au sili ona aogā. Na mae'a lea sauniga ona faasolo ai lea o Leoleoga o le po, ma mapu atu ai i lona aiga. O le taeao o le Aso Toona'i 27/2/21 na fai ai ona toe sauniga, i le malumalu o le Ekalesia Metotisi i Talimatau. Sa auai le toatele o Toeaina, Sea, ma le aufaigaluega o le Pulega EFKS Falealili, o le Pulega EFKS Aiga i le Tai, o le Sinoti Metotisi Apia Sisifo, o Vasega a ana fanau faifeau, o le Asosi Tamaitai Tausi Soifua faapea aiga ma uo. Na ta'ita'i le susuga Luteru Loli ma faiatou le Tusi Paia. O le failautusi o le Sinoti Apia Sisifo, susuga Faavevela Tuatō na saunia Tatako, a o le susuga Amosa Vaetoe FS (Faafeagaiga EFKS Matautu/Failautusi Pulega Falealili) na faia le lauga. "O Asomaliu, o le auauna faamaoni a le Atua." O le autu lea o le molimau a le faafeagaiga i lo latou galulue ai i Matautu Falealili, o se faletua galue faamaoni i ona nafa eseese i le galuega a le Atua, i lo la'ua tofi A'oa'o Fesoasoani, i le Mafutaga Tina, i le Aufaipese e malaga atu i Apia ae muamua lava i a'oga pese. Na faatusa i le auauna a Aperaamo na auina e saili se faletua o Isaako, lea na fai atu ai Lapana, "*Maliu mai ia o oe ua faamanuia e le Alii; se a le mea ua e tu ai i fafo?*" E faapea le valaau mai o le Matai i lana auauna fafine ina ia ulufale atu i le fiafia o lona Alii. Na molimau le afioga Tupuola i la la'ua mafutaga mafana faatasi ma le fanau; molimau le Peresetene Asosi Tamaitai Tausi Soifua i lana auaunaga mae'ae'a faa-tausi ma'i. O a'u na molimau fai ma sui o lona aiga, ma ototo ai lona tupu'aga. O lona tamā o **Nakiso** So'aga Le'imoa (mai ia Naituā Matamua Ti'a i Foua Salelologa). O lona tina o **Naoafioga** Falepau Tulia (mai ia Meripa Tapua'i Leilua Arona Faalogo i Sagone). E ogatotonu i le fanau e to'a 9 na fananau i Foua i le fanua *Lautala* o le aiga sa Ti'ā, ua ofoina mo le EFKS. Na siitia ona matua ma le toatele i Sagone i le aiga o lona tina, ae nonofo pea nisi i Salelologa. O le mafuaaga lea o le eseese o faai'u, ma le tausi lua o tapuaiga EFKS ma le Metotisi. E to'a 5 le fanau; o lana ulumatua (Theresa Kini Ulu) o loo galulue i le Metotisi Salepoua'e, ao le lona lua (Naoafioga P. Sao) i le EFKS Lepuia'i

## **OFA ATAFUA LAUAMA TALI.**

**(13/10/1968-28/12/2020) 52+2+16**

O le faletua o le alii tiakono o Lafaitele Lauama Tali. O lona tamā o Maina Atafua Ape o Nu'uuli ma si ona tina o Sina Satele Atafua mai Alao Amerika Samoa. Na soifua a'e i lona aiga i Nu'uuli i le Aso Sa, 13 Oketopa 1968, ae maliu i le Aso Gafua, 28 Tesema 2020, i le falemai o Fountain Valley i Kaledonia, Amerika. Na faaipoipo atu ia Lafaitele Lauama Tali i le 1988. E toatasi si o la alo. Ae toalua fanau a si a lā tama. E tolusefulu ma le lua tausaga o le feagaiga. Na avea o se matafale fesoasoani, e lē mafai ona pa'ū i se mea fai ma sailiga a le Eklesia. A'o le masina o Iulai 2017, sa faapa'iaina ai loa lo la tofi tiakono ma galulue ai, o se matafale malosi i totonu o le aulotu EFKS AGAPĒ i Garden Grove CA. Sa galue foi Ofa, o se totino malosi i totonu o le Mafutaga Tina. O Ofa o se tina e tamalii ona uiga. E amio solia ma tausaafia. E tausi mamalu ma iloa lona vā tagata. E moni lava, e lē tauilo alo o tupu. E lē lagona sona leo, e galue gūgū, ae malie lo ta loto i le faatinoga o ana galuega. E faamaoni, e loto alofa. E molimau le Eklesia i ona uiga ia, e molimau foi lona aiga, ma le aiga o lana tane. O lana tauloto masani i lona toalua i vaiaso ta'itasi, '*Ia mautinoa se taumafataga a le faifeau, ma ave le faifeau e faamalositino i le malae ta polo.*' E faagalo gatā lenei tina lototele. O ona sauniga faale-aiga, sa faia i le Aso Faraile 27 Januari 2021 i lo matou fanua i EFKS-AGAPĒ. Talu ai ona o le vavao a le nei aai ma sā o le faama'i COVID-19, o le ala lea na faatapulaa ai le aofaiga o tagata i ona sauniga. Sa ta'ita'i lava e le aufaigaluega a lo latou aiga.

O ona toe sauniga, sa faia lea i le fale maliu o le Westminster Mortuary. Sa ou ta'ita'iima le sauniga. Sa molimau si o la alo e to'atasi o Lauama Jr Tali e tusa o le la mafutaga ma si ona tina. Na molimau foi si ona alii, Lafaitele Lauama Tali TK, e tusa o le la mafutaga faale-ulugalii. O le A'oa'o Fesoasoani o Elekana Asiata AF na saunia talosaga. Sa ou faia le upu faamalosi mo le Tiakono ma nai o la aiga. E fa'aautū i le Tusi a Iosua 4:5. *Ia outou ui atu i luma o le atolaa a le Alii lo outou Atua i totonu o le Ioritana, ma ia outou ta'itasi ma sii a'e se ma'a i lona ua.* O Ofa o le tagata tautua i le Atua, e ui ane i luma o fofoga o le Atua, se'i silasila atu le Atua i le faatinoga o ona faiva ma ona tiute. E sii le maa i lona ua, o le faailoga o taulaga e sii a'e i le fata, e tali atu ai i le agalelei ma le alofa mai o le Atua. Ae leai

foi se matāua o le afu sisina o le tagata tautua, e lilo i Lana silasila. E lē pa'ū fua foi i le eleele. E faamanuia foi le Atua, e tusa o lona tautīgā. Ona faai'u ai lea o ona sauniga i le tuuina ifo o lona tino i le tuugamau. Ma matou faatofa atu ai i le Pese 268, *Talofa uso e, tofaina oe. Ua sau le itupo e malolo.*

Alu ia oe ma le manuia Ofa. Mapu atu i aao o le faavavau. Ua silasila Keriso i lou tautiga ma valaau mai ia te oe, *Ulufale mai ia i le fiafia o lou Alii.* Manuia le malaga.

*Rev Filo Tauaivale*

*EFKS AGAPĒ Garden Grove, Matagaluega Amerika.*

## **ASOMALIU TUPUOLA (NAKISO)**

Manono; e to'a 18 fanau a lana fanau. Sa fai o ia ma tina i le toatele o ona uso ma tuagane ma latou fanau, ma fanau o le aiga o Tupuola, e leai se tasi na taofia ai lana 'ote faatonu a le tina alofa, lea ua i'u lelei ai a'oga ma maua galuega lelei. Na a'oa'oina i le Kolisi Tuasivi 1966, feiloa'i ma Misi Tupuola i le Kolisi Leulumoega 1970, le tausaga na ulufale ai i le Aoga Faa-Tausima'i. Na 'au'au la'u molimau i Upu mai le Faataoto ma le Pese a Solomona, "*E toatele fafine e amio lelei i latou; a o oe, ua faasilisili oe ia i latou uma.*" *Faata.31:29.* "*O oe na, le sili ona lalelei i fafine, se a se mea e sili ai lou manamea i se isi manamea?*" *PS 5:9.* O le upu lea o faatusatusaga, 'sili atu/better' ou te faamatalaina ai le tuafafine: Asomaliu was a better woman, mother, nurse, and faithful believer-better than us all. Ae pe aisea e sili ai lona manamea? Ona ua faaolaina ma faatuatua i le lalelei o le alofa o le Atua ua fa'aalia ia Iesu Keriso. Le alofa o faamatala i le nanamu o lona u'u ma lana uaina, o valoaga i le vai ma le toto na maligi mai le satauro o Keriso. Soo se tasi e faatuatua ma faamamāina ai, e tauivi ia fai ma tagata e faasilisili (better) lona ola faaleagaga. Sa faapena Asomaliu. Na faai'u ona toe sauniga i le nofoaga o loo lagomau ai i lona aiga i Talimatau, faamavae ma faatofa ai. "*E tumau le faamoemoe ia Iesu, ta te toe feiloa'i ai.*" Ia manuia lau malaga Riu le tuafafine pele; faamaiseina le tamā ia Tupuola Tusa Misi, le fanau ma aiga pele, o paaga faa soifua maloloina, ma uso faatuatua EFKS ma Metotisi. Ia faamanūina le suafa o le Alii, o Ia na foa'i mai, o Ia foi ua na toe aveeseina.

*Saunia: Faito'aga Ti'a Tolua FS.*

# **O Ē UA FAI I LAGI LE FOLAUGA**

**ASOMALIU TUPUOLA TUSA  
MISI TUPUOLA (nee NAKISO)**

**OFA ATAFUA LAUAMA TALI**



**ATA O LE OSIGA FEAGAIGA EFKS PETANIA FOU,  
FALEATA (Januari 2021)**



*(Maima F. Mata'utia, Lila & Enoka Pouniu FS (Feagaiga EFKS Petania -fou), Faauuga Mata'utia FT,  
Tafao M. Faatau, Mataia & Simalua Apisaloma TT, Sapini E. Pasia (Tina Penisione))*